

IN MEMORIAM

Admir Mulahusić*

OMEROVIĆ FADIL, geodet, geograf i kartograf

Rođen u Novom Selu, općina Zvornik, 28. 08. 1955 – preminuo u Sarajevu, 27. 03. 2007. Osnovnu školu je završio u rodnom mjestu, a srednju stručnu školu u Zvorniku. Godine 1974. upisao se na Vojnu akademiju – smjer Geodetska služba, pri Centru visokih vojnih škola u Beogradu.

Diplomirao je 1978. godine, nakon 8 semestara vojnog obrazovanja i uspješne odbrane diplomskog rada na temu: *Kartografsko generalisanje naseljenih mjesta za razmjerni niz topografskih karata*, iz naučne oblasti Kartografija. Tako je stekao visoko vojno obrazovanje, te je raspoređen na službu u Hidrografski institut ratne mornarice - Split.

Punih 15 godina proveo je u Odjeljenju za naučno-istraživački rad tog Instituta, na poslovima ekspedicijskog karaktera - istraživanje istočnojadranske obale, Jadranskog mora i podmorja. U tom periodu samostalno je uradio više naučnih i stručnih radova, studija, elaborata i karata, te sarađivao u nekoliko naučnih projekata.

Uz rad se aktivno usavršavao, tako da je položio sve zakonom predviđene ispite za čin majora geodetske službe, te završio 10 semestara Geodetskog fakulteta na Univerzitetu u Beogradu.

Diplomirao je na temu: *Mogućnosti automatizovane generalizacije linijskih elemenata s posebnim osvrtom na generalizaciju obalne linije mora*, i tako stekao zvanje diplomiranog inženjera geodezije.

Postdiplomski studij iz oblasti Geografije - nastavni smjer, upisao je 1989. godine, na Prirodno-matematičkom fakultetu, Univerziteta u Sarajevu.

Naučni stepen magistra geografije stekao je 1996. godine, nakon završenog postdiplomskog studija i odbranom magistarskog rada iz oblasti Fizičke geografije na temu: *Submarinski odnosi i dinamika mora na ušću Neretve*.

Iste godine izabran je u naučno-nastavno zvanje višeg asistenta za nastavni predmet Kartografija. Od 1997. godine, zaposlen je na Odsjeku za geografiju Prirodno-matematičkog fakulteta, Univerziteta u Sarajevu. Uporedo s nastavnim aktivnostima radio je na izradi doktorske disertacije iz naučne oblasti Fizička geografija pod naslovom: *Reljef dna mora i priobalja u prostoru zaliva Neum-Klek*.

Nakon uspješne javne odbrane disertacije, koja je provedena 25. 10. 2002. godine, stekao je naučni stepen doktora geografskih nauka.

U naučno-nastavno zvanje docenta izabran je 27. 03. 2003. godine, za nastavni predmet Kartografija na Odsjeku za geografiju Prirodno-matematičkog fakulteta Univerziteta u Sarajevu. Od akademske 2006/2007 godine angažiran je u nastavi na Odsjeku za geodeziju Građevinskog fakulteta Univerziteta u Sarajevu. Pored angažmana u nastavi, aktivno sudjeluje u radu Geografskog društva Federacije Bosne i Hercegovine.

*Mulahusić Admir, dipl.ing.geod.

U časopisima *Geografski list* i *Geografski pregled* objavio je veći broj naučnih i stručnih radova, pri čemu se posebno ističu dva originalna naučna rada, objavljena na međunarodnim kongresima geografa: *Fizičkogeografske determinante BH Primorja, Sarajevo 2004*, i *Promjene pada na uzdužnom profilu Neretve, Skoplje 2005*.

Nažalost, docenta Omerovića poznao sam kratko vrijeme ali sam kroz njega spoznao da su svi veliki ljudi, gotovo po pravilu, izuzetno jednostavni. Uvijek je bio spreman da sasluša druge i da nesebično pruži pomoć. Radne kolege i studenti su ga voljeli i poštovali. U svojoj bolesti bio je gord i izvišen. Vjerovao je da će pobijediti velikog neprijatelja, ali nažalost nije uspio u tome. Na nama je da se sa sjetom i tugom sjećamo Fadila Omerovića, ali da istovremeno budemo i sretni što smo ga poznavali.

Nakon kratke i teške bolesti umro je u Sarajevu 27. 03. 2007. godine.